

**Regulamento do proceso precongresual**

---

# **4º Congreso**



**Confederación Intersindical Galega**

[www.galizacig.com](http://www.galizacig.com)

---



# Regulamento do proceso precongresual do 4º Congreso da CIG

---

## Artigo 1º.- Composición do Congreso

---

O Consello Confederal da CIG acordou, con data do 29/06/04, convocar o 4º Congreso da Confederación Intersindical Galega para os días 28 e 29 de maio do 2005, a celebrar na cidade de Compostela.

Este congreso compoñerase de 500 congresistas de elección directa máis os membros do Consello Confederal e os da Comisión de Garantías.

O período de cotizacións, para facer o reparto proporcional de congresistas que corresponden por comarca e federación, será o comprendido entre o 01/07/03 e o 30/06/04.

Ao 31/12/04 fixarase a relación definitiva de membros do Consello Confederal que son membros natos do Congreso.

Os congresistas deberán estar todos electos con data do 17/04/05, inclusive.

## Artigo 2º.- Período de celebración das asembleas de unión comarcal e congresos nacionais de federación

---

Seis meses despois de feita a convocatoria do Congreso da CIG por parte do Consello Confederal, as unións comarcais e as federacións fixarán as datas das súas asembleas e congresos respectivos, tendo como data tope para a súa celebración o 31/10/05. Para efectos das federacións esta data debe interpretarse como unha recomendación.

## Artigo 3º.- Asignación e distribución dos/as congresistas

---

Para os efectos de determinar o número de congresistas de elección directa que lle corresponden a cada Unión Comarcal e a cada Federación, a Executiva Confederal fará un reparto inicial do número de congresistas que corresponden elixir por cada unión comarcal e dentro destas por cada federación. Para facer este reparto terá en conta a media de cotizacións ingresadas por cada unha destas estruturas no período establecido no Artigo 1º deste regulamento. Posteriormente, seguindo o mesmo criterio, dentro de cada federación a nivel comarcal, farase unha segunda distribución por empresas, tendo dereito a elixir congresistas todas aquelas empresas con fraccións igual ou maior que 1,00.

No sector da Saúde o concepto empresa identifícase cos centros de traballo que teñan xerencia propia, incluíndo atención primaria. No caso da Administración asimilárase o concepto empresa aos sectores recoñecidos na Federación: Central, Autonómica, Xustiza, Correos e Universidade. No caso da Local, cada concello ou deputación terá a consideración de empresa.

As federacións a nivel comarcal que, froito desta distribución, non teñan dereito a 1,00 congresista, agruparanse todas elas para elixir en común os congresistas que lles correspondan.

No caso daquelas empresas que tendo dereito a elixir delegados/as optan por non o facer, eses delegados/as decaen, non podendo ser electos pola asemblea comarcal da federación, nin participar nela os afiliados/as pertencentes a estas empresas. Igual criterio será aplicábel para aquelas federacións que non elixan todos os congresistas a que teñen dereito.

Cada afiliado/a só poderá participar nunha asemblea, na do seu centro de traballo ou na do seu sector na comarca.

## Artigo 4º.- Asembleas pre-congresuais

---

As asembleas pre-congresuais das federacións nas unións comarcais desenvolveranse en dous períodos, un primeiro período de celebración de asembleas de afiliados/as exclusivamente para debate dos relatorios e un segundo período de asembleas de afiliados/as exclusivamente para elección de congresistas.

A executiva comarcal de cada federación ou órgano equivalente será a responsábel da convocatoria das asembleas e todo o que isto leva consigo (comunicación aos afiliados/as, seguimento dos censos, recollida de candidaturas, preparación do material necesario para a celebración das mesmas, recollida das actas e o seu envío a nivel nacional...). Naquelas federacións que non estean contituídas na comarca, asumirá esa responsabilidade a Executiva da Unión Comarcal. Da convocatoria das asembleas sectoriais comarcais darase información á Executiva da Unión Comarcal, cunha antelación mínima de dúas semanas. De todas estas convocatorias farase exposición pública nos taboleiros de anuncios dos locais correspondentes.

Todos os afiliados e afiliadas deberán ser convocados por escrito, mediante carta remitida con polo menos quince días de antelación á data fixada para a celebración da asemblea. Nesta carta deberá constar: día e hora de celebración das asembleas, tanto a correspondente a debate dos relatorios como a de elección de congresistas, lugar das mesmas, temas a tratar, cargos a elixir, se é o caso, así como prazos de presentación de candidaturas.

**As asembleas de debate dos relatorios** celebraranse nas cabeceiras das unións locais constituídas en cada unión comarcal. De cada unha destas asembleas redactarase unha acta parcial cos votos acadados por cada unha das emendas ou relatorios alternativos presentados. Cos datos destas actas parciais elaborase unha acta global a nivel da unión comarcal, na que figurarán o número de votos totais acadados por cada emenda ou relatorio alternativo, para efectos de determinar as que acadan o mínimo de votos exixíbeis para pasar a debate no Congreso. Esta acta global será remitida á Comisión Nacional de Organización. Todas estas asembleas estarán presididas polo organismo convocante das mesmas ou por unha representación deste nomeada para tal fin. O período de celebración destas asembleas fíxase entre o 05/03/05 e o 20/03/05.

**As asembleas de elección de congresistas** faranse seguindo o criterio de garantir a maior participación posíbel. No caso de que existan incompatibilidades de horarios por mor das quendas de traballo, deberán fixarse, por parte do órgano competente, diferentes horarios de votación para unha mesma asemblea, podendo en sectores con características especiais (Mar e Transporte) fixar tamén días diferentes para unha mesma asemblea. Así mesmo, poderanse celebrar tamén asembleas naquelas localidades con locais da CIG en funcionamento, sempre que haxa un mínimo de 15 afiliados/as no sector. En todos estes casos, as asembleas parciais estarán presididas pola Mesa Central, se as circunstancias o permiten, ou ben por unha Mesa elixida para o efecto na propia asemblea, redactándose acta dos resultados de cada unha destas votacións, conformándose ao final do proceso unha acta global, asinada pola Mesa Central, cos resultados de todas as actas parciais. As diferentes candidaturas que concorran ao proceso poderán nomear interventores en todas as mesas electorais, máximo un por mesa, con voz e sen voto. Para ser interventor só se require ser afiliado da Federación, coas cotas ao día e unha antigüidade de 3 meses. Estas asembleas celebraranse entre o 26/03/05 e o 17/04/05.

Segundo os Estatutos da Confederación, para ter dereito a votar e ser votado, cómpre ter as cotas ao día e unha antigüidade mínima de tres meses de afiliación, con data dun día antes ao da celebración da asemblea.

## Artigo 5º.- Censos

---

As Executivas das Unións Comarcais elaborarán os censos de afiliados/as por federacións, facendo entrega dunha copia a cada unha delas e dándolles publicidade nos taboleiros de anuncios, conforme ao seguinte calendario:

- Data do censo de afiliados/as, ao 10/01/05
- Período de exposición e reclamacións ao mesmo do 10/01/05 ao 10/02/05

- Prazo para resolución das reclamacións do 10/02/05 ao 20/02/05
- Data publicación censo corrixido o 26/02/05

No censo deberán constar os seguintes datos: nome e apelidos, Número de afiliado, data de alta como afiliado/a, data da última cotización, centro de traballo, concello, unión local.

As reclamacións ao censo faranse a través das executivas comarcais das federacións, as cales darán traslado das mesmas á Executiva da Unión comarcal para que resolva.

Unha copia dos censos definitivos será enviada á Comisión Nacional de Organización en soporte informático por cada unha das Comarcas.

Outra copia dos censos seralle entregada ao presidente da Mesa Presidencial das asembleas, así como aos interventores daquelas candidaturas que o soliciten. No censo que se lle entregue á mesa presidencial deberá figurar o documento de identidade dos afiliados/as censados/as.

## **Artigo 6º.- Candidaturas**

---

As candidaturas para congresistas deberán conter como mínimo un número igual ao de postos a cubrir, podendo figurar como suplentes como máximo o triple dos mesmos.

As candidaturas serán presentadas á Executiva comarcal da federación, ou órgano equivalente, podendo facerse desde o día de convocatoria da asemblea até 48 horas antes de celebración da mesma. O órgano responsábel de recoller as candidaturas deberá comprobar que todos/as os/as candidatos/as reúnen os requisitos estatutarios para se poderen presentar ás eleccións, notificando aos promotores, dentro do prazo das 24 horas seguintes, aquelas deficiencias que detecte. Os promotores das candidaturas teñen de prazo até unha hora antes da asemblea para corrixir as deficiencias detectadas, dándose a partir deste momento por proclamadas as candidaturas definitivamente. Para estes efectos son inhábiles os sábados, domingos e festivos.

Calquera baixa que se produza unha vez proclamadas definitivamente as candidaturas, non invalidará estas sempre que as mesmas manteñan un número de integrantes equivalente ao 60% do total.

De todas as candidaturas presentadas, nada máis seren recibidas, darase publicidade no taboleiro de anuncios e farase entrega das mesmas, no seu momento, á Mesa presidencial da asemblea. Nas candidaturas debe figurar o nome e apelidos dos candidatos/as, empresa, sector e sinatura dos candidatos en conformidade coa mesma.

Ningún organismo ou cargo da central como tal realizará, custeará ou distribuirá propaganda a favor de ningunha candidatura.

## **Artigo 7º.- Mesa presidencial e votacións**

---

O organismo convocante será o responsábel de dar inicio ás asembleas procedendo á elección dunha Mesa Presidencial e proporcionándolle a esta toda a documentación que precise. A devandita mesa constará de presidente/a, secretario/a e vocal e deberá contar co respaldo de 2/3 dos electores presentes. Se na primeira votación non se acadasen os 2/3, farase unha segunda votación e de non se acadar de novo os dous terzos, constituirase a Mesa mediante asignación dos seus membros a cada unha das candidaturas presentadas en proporción aos votos obtidos. Unha vez elixida a Mesa Presidencial, esta será a responsábel da marcha da asemblea, de proclamar as candidaturas e de redactar acta de todas as decisións que se tomen na mesma. A Mesa Presidencial dispoñerá do censo definitivo de afiliados/as con dereito a voto, así como do resto de material obxecto de debate na mesma. As decisións na Mesa adoptaranse por maioría.

As votacións serán mediante papeletas individuais por candidaturas, iguais en tamaño e cor. Unha vez feito o recuento dos votos, farase por parte da Mesa a asignación dos representantes que corresponden a cada candidatura, segundo reparto proporcional ao número de votos obtidos por cada unha delas. Caso de existir unha soa candidatura ou de se producir unha de síntese, poderase utilizar, por decisión unánime das persoas integrantes da candidatura, o método de votación en lista aberta, tendo cada afiliado/a dereito a votar como máximo por un número de candidatos/as equivalente ao 75% dos postos a cubrir.

Do resultado da votación a Mesa presidencial redactará acta, que será asinada polos seus membros. Da acta expoñeráse copia no taboleiro de anuncios durante os tres días laborabeis seguintes e entregarase copia ao órgano convocante da asemblea. Transcorridos eses tres días sen que exista impugnación, darase por válida a devandita acta, a cal será remitida á Comisión Nacional de Organización (Executiva Confederal).

As impugnacións á acta poderanse presentar por parte de calquera afiliado/a afectado ao Presidente/a da Mesa, resolvendo esta en primeira instancia no prazo máximo de 48 horas. No caso de desacordo coa resolución da Mesa, o impugnante ten tres días laborais para recorrer á Comisión de Garantías da Confederación, a cal deberá resolver no prazo de dez días. A decisión da Comisión de Garantías non é recorríbel.

Non se consideran válidos os votos por correo, nin o sistema de urnas itinerantes.

## **Artigo 8º.- Congressistas**

---

O cargo de congresista é persoal e intransferíbel, agás causa de forza maior que impobilite a asistencia. Neste suposto, o afectado/a comunicará por escrito a súa baixa como congresista á Comisión Nacional de Credenciais, a través da federación ou da unión comarcal, podendo ser substituído/a polo seguinte da súa mesma lista, no caso de listas pechadas, ou polo seguinte en número de votos, no caso de listas abertas. Unha vez comprobados por parte da Comisión de Organización os datos da persoa con dereito a substituír o congresista que causa baixa, procederá a estenderlle a credencial correspondente, facéndolla chegar a través da estrutura federativa ou comarcal a que pertenza. O prazo máximo para proceder a este tipo de substitucións rematará 24 horas antes da hora fixada para o inicio do Congreso. Este criterio faise extensivo a calquera proceso interno que exixa elección previa de delegados.

Os congresistas natos non poderán participar como candidatos na elección a delegados/as ao Congreso.

Todos/as os/as congresistas deberán portar unha tarxeta identificativa para poder participar nas sesións congresuais. Estas tarxetas entregaranse pola Comisión de Credenciais ao inicio do Congreso, previa presentación por parte do interesado/a do documento de identidade ou análogo.

## **Artigo 9º.- Comisións Precongresuais**

---

Créase unha Comisión de Organización do Congreso formada pola Executiva Confederal.

Créase unha Comisión de Credenciais integrada por 3 membros da Executiva Confederal, entre eles o Secretario Confederal de Organización, e polos Secretarios de Organización de cada unión comarcal, ou persoa na que estas deleguen.

A Comisión de Garantías para todo o proceso congresual será a mesma existente na CIG, elixida no 3º Congreso.

## **Artigo 10º.- Financiamento**

---

O financiamento dos gastos inherentes ao proceso congresual correrá a cargo de cada estrutura afectada polos gastos en cuestión. Os gastos de índole nacional que se produzan, así como os derivados da celebración das sesións congresuais, correrán a cargo da Caixa Nacional da CIG.

## **Artigo 11º.- Relatorios e emendas**

---

Os relatorios deberán estar elaborados e aprobados polo Consello Confederal da CIG na data do 13/02/05. Elaboraranse os seguintes relatorios:

- a) Informe da Executiva Confederal. Será elaborado pola Executiva e distribuído aos congresistas con dez días de antelación ao inicio das sesións do 4º Congreso.

b) Informe de contas. Será elaborado pola Executiva Confederal e distribuído aos congresistas con dez días de antelación ao inicio das sesións do 4º Congreso.

c) Regulamentos das sesións do congreso.

Organización e estatutos.

Documento base sobre o marco político e acción sindical.

Os relatorios sinalados nos apartados c), d), e) serán elaborados por senllas comisións nomeadas polo Consello Confederal de entre os seus membros.

Os relatorios serán aprobados polo Consello Confederal, tendo a consideración de relatorios oficiais aqueles que acaden o respaldo da maioría dos membros asistentes á sesión do mesmo. Así mesmo, repartiranse conxuntamente cos oficiais todos aqueles relatorios que contén co respaldo dun 25% dos membros asistentes. Nos relatorios farase constar o respaldo orgánico co que contan.

As emendas e relatorios alternativos para pasar a debate no Congreso Confederal deberán contar, a nivel do global das asembleas de federación celebradas nunha unión comarcal, co respaldo do 20% dos asistentes e un mínimo de 15 votos.

Estas emendas e relatorios alternativos deberán remitirse á Comisión Nacional de Organización, con data tope do 30.03.05, con indicación do portavoz que vai defender cada unha delas no pleno do Congreso. De non saíren electos congresistas, os portavoces das emendas poderán delegar a defensa destas en calquera outro congresista, tendo que comunicar os datos deste á Comisión Nacional de Organización, através da súa federación ou unión comarcal, tendo de prazo até 48 horas antes do inicio do Congreso.

Das emendas e relatorios alternativos farase chegar copia a todos os congresistas antes da celebración do Congreso.

## Calendario pre-congresual

Convocatoria do Congreso.	29/06/04
Data tope fixación nominal dos membros natos do Congreso Confederal.	31/12/04
Data confección censos de afiliados/as.	10/01/05
Prazo de exposición e reclamacións aos censos.	10/01/05 – 10/02/05
Prazo resolución reclamacións aos censos.	10/02/05 – 20/02/05
Data publicación censos corrixidos.	26/02/05
Data tope para a aprobación das relatorios polo C. Confederal.	13/02/05
Celebración asembleas federativas comarcais debate relatorios.	05/03/05 – 20/03/05
Celebración asembleas federativas comarcais elección congresistas.	26/03/05 – 17/04/05
Data tope envío emendas á Comisión Nacional de Organización.	31/03/05
Data tope envío congresistas electos á Comisión Nacional de Organización.	22/04/05

**Data celebración 4º congreso CIG 28-29 de maio de 2005**



**Confederación Intersindical Galega**

[www.galizacig.com](http://www.galizacig.com)